

醫門法律二卷中寒門目錄

陰病論

論辨中寒證要法五條

論治中寒病用藥八難

論朱丹谿述中寒二條

論戴元禮述中寒一條

中寒色脉六則

律三條

比類傷寒論陽虛陰盛治法并死證三十一則

比類金匱論水寒五則

比類金匱論胃寒四則

比類金匱論胸腹寒痛十七則

比類金匱論虛寒下利六則

二卷中寒門方目

一附薑白通湯

二附薑湯

三附薑歸桂湯

四附薑歸桂參甘湯

五辛溫平補湯

六甘寒補氣湯

七桂枝湯加附子方

八真武湯

九芍藥甘草附子湯

十茯苓四逆湯

十一桂枝去芍藥加附子湯

十二乾薑附子湯

十三附子瀉心湯

十四甘草附子湯

十五四逆湯

十六通脈四逆加減湯

十七白通湯

十八白通加豬胆汁湯

十九附子湯

二十麻黃附子甘草湯

二十一白朮附子湯

二十二桂枝去芍藥加麻辛附子湯

二十三崔氏八味丸

二十四括蘂瞿麥丸

二十五薏苡附子散

二十六烏頭赤石脂丸

二十七九痛丸

二十八附子粳米湯

二十九大建中湯

三十大烏頭煎

三十一大黃附子湯

三十二赤丸

醫門法律卷之二

西昌喻昌嘉言甫著

中寒門

論一首
律三條

法十三條
比類法六十九條

風寒暑濕燥火六氣分配手足各六經百病之生莫不繇之
軒岐論列要在於此然原始上古經文先師儗季貸所傳每
思洪荒初闢結繩紀事書從何來豈光音天化生世界蚤有
天醫降下乎抑仰求大自在天而得之乎然則醫藥者上天
之載也窮理盡性至命首推醫學矣去古漸遠無階可升曰
取內經讀之其端緒或有或無有者可求無者將何求耶君
相二火及燥氣未曾深及即寒之一氣賴先聖張仲景推演
傷寒中寒爲二論不知中寒論何以不入金匱之藏至晉初

即無可搜求并其弟子衛沈四逆三部厥經亦亡從未有老
醫宿學記載一語晉人之淺於譚醫豈待問哉設使晉代仙
醫許旌陽葛稚川之流仰遡丹臺紫府大自在天之藏得其
原論亦未必爲當世之所好矣昌既尙論傷寒論不揣凡鶻
竊欲擬議仲景傳世之文以窺見不傳之一斑後及內經之
風熱暑濕并燥火缺略百病傳訛綿力任重老而不休志非
不苦但以從不見聞之說定爲率由坦道按劍而詫不祥在
所不免然千百中豈無一二知己取其大關略其小失乎見
爲是者因其是暢發奧旨見爲非者因其非另監偉議總不
肯安上世至今相沿之黯汶而必欲耀之光明有仲景表章
內經於前有諸君子表章內經金匱於後昌於後輩中如雜

劇登場漫引其端要不謂非箇中人物也且昌數十載寤寐
誠求纔脫凡身必承提命此番公案尙有待於再來云

陰病論

喻昌曰太極動而生陽靜而生陰陽動而不息陰靜而有常二
氣交而人生二氣分而人死二氣偏而病起二氣乖而病篤聖
神憂之設爲醫藥調其偏駁使歸和平而民壽以永觀於生氣
通天論中論人心陽氣如天之與日失其所則折壽而不彰是
雖不言陰病而陰病之機宛然可識但三皇之世如春陽和司
令陰靜不擾所以內經凡言陰病但啓其端弗竟其說厥後國
政乖訛陽舒變爲陰慘天之陽氣閉塞地之陰氣冒明冒明者
以陰濁言蔽陽明也百川沸騰山冢翠崩高岸爲谷深谷爲陵

詩所言之矣民病困之橫天宏多宛莫識其所以橫天之故漢
末張仲景著傷寒論十卷治傳經陽病著卒病論六卷治暴卒
陰病生民不幸卒病論當世卽已失傳豈非其時賢士大夫莫
能深明其義金匱玉函置而弗收其流布民間者悉罹兵火之
厄耶仲景已後英賢輩出從未有闡揚其烈者惟韓祇和於中
寒一門微有發明誨人以用附子乾薑爲急亦可謂仲景之徒
突然自有醫藥以來祇道其常仲景兼言其變詎而按劍勢
所必至越千百年祇和草澤一家之言已不似仲景登高之呼
矣况有丹谿節齋諸縉紳先生多主貴陰賤陽立說曰陽道饒
陰道乏曰陽常有餘陰常不足曰陰氣難成易虧故早衰製爲
補陰等九疇重乎陰疇非至理第於此道依樣葫蘆未具隻眼

然世醫莫不奉以爲宗卽使卒病論傳之至今亦與傷寒論同其悠悠汶汶也已嗟乎化日舒長太平有象亂離愁慘殺運繁興救時者儻以貴陰賤陽爲政教必國非其國治病者儻以貴陰爲藥石必治乖其治矣豈通論哉昌尙論仲景傷寒論於凡陰病見端當以回陽爲急者一一表之吾門已駸駸知所先矣今欲并度金鍼暢言底裏易云通乎晝夜之道而知夫晝爲陽羣陰莫不潛伏夜爲陰羣陰得以現形諸鬼爲之夜食一切山精水怪揚氛吐燄伎倆無窮比雞鳴則盡隱矣蓋雞鳴夜雖未央而時則爲天之陽也天之陽開則長夜不至漫漫而將旦也陰病之不可方物此見一斑而誰爲燃犀之照也哉佛說四百四病地水火風各居百一是則四百四病皆爲陰病矣夫水火

木金土在天成象在地成形原不獨畸於陰然而五行皆附地而起水附於地而水中有火火中有風人所以假合成身身所以相因致病率稟四者金性堅剛不受和合故四大惟金不與證無生者必修西方佛土有繇然也世人但知地氣靜而不擾偶見地動便駭爲異不知地氣小動則爲災眚大動則爲劫厄劫厄之來天地萬物凡屬有形同歸於壞然地氣有時大動而世界得不速壞者則以玄天真武坐鎮北方攝伏龍蛇不使起陸以故地動而水不動水不動而水中之火火中之風自不動也仲景於陰盛亡陽之證必用真武湯以救逆者非以此乎至於戊亥混茫亦非天翻地覆互相混也天原不混於地迺地氣加天而混之耳蓋地水火風四輪同時轟轉雷礮冲射之威干

百億道震盪於五天之中頃之攪毀太空混爲一區而父母所
生血肉之軀其陰病之慘烈又當何如禪宗有白浪滔天劫火
洞然及大千俱壞等語豈非四大解散之時實有此象乎究竟
地氣之加於天者止加於欲界色界等天不能加於無色界天
所以上八景中忉利天宮萬聖朝真兜率內院諸天聽法各各
身除中陰頂現圓光由此直接非想非非想天而入佛界法界
覩大千世界若掌中一果矣更何劫運可加之耶劫運所加之
天至子而開陰氣下而高覆始露至丑而陰氣盡返於地而太
空始廓兩儀分奠厥位日月星辰麗乎天華嶽河海附乎地五
天之氣散佈於列曜九地之氣會通於山澤以清以寧曰廣曰
大庶類以漸萌生而天界隙中所餘暴悍濁陰動輒綿亘千萬

丈排空直墜摧殘所生靡有子遺天開地闢以後餘慘餘殃尙
若此其可畏必至寅而駁劣悉返冲和天光下濟地德上承名
水嘉卉纍纍實垂光音天人下食其果不復昇舉因得施生乃
至繁衍而成天地人之三界也此義關係人身性命病機安危
最宏最鉅儒者且置爲不論不議醫者更蔑聞矣昌每見病者
陰邪橫發上干清道必顯畏寒腹痛下利上嘔自汗淋漓肉瞤
筋惕等證卽忙把住關門行真武坐鎮之法不使雷龍昇騰霄
漢一遵仲景已傳之秘其人獲安倘失此不治頃之濁陰從胸
而上入者咽喉腫痺舌脹睛突濁陰從背而上入者頸筋龕大
頭項若水轉盼渾身青紫而死調非地氣加天之劫厄乎惟是
陡進附子乾薑純陽之藥亟驅陰邪下從陰竅而出非與迅掃

濁陰之氣還返地界同義乎然必盡驅陽隙之陰不使少留乃
得功收再造非與一洗天界餘氛俾返冲和同義乎會仲景意
中之法行之三十年治經百人凡遇藥到莫不生全雖曰一時
之權宜卽擬爲經常之正法可也醫學缺此誠爲漏議謹立鄙
論以開其端後有作者出其廣大精微之蘊是編或有可採云
耳

卒中寒者陽微陰盛最急最危之候經曰陰盛生內寒因厥氣
上逆寒氣積於胸中而不泄不泄則溫氣去寒獨留留則血凝
血凝則脉不通其脉盛大以濇故中寒內經之言若此今欲會
仲景表章內經之意敷陳一二敢辭饒舌乎

經旣言陰盛生內寒矣又言故中寒者豈非內寒先生外寒後

中之耶經既言血凝脉不通矣又言其脉盛大以濇者豈非以外寒中故脈盛大血脉閉故脉濇耶此中伏有大疑請先明之一者人身衛外之陽最固太陽衛身之背陽明衛身之前少陽衛身之兩側今不繇三陽而直中少陰豈是從天而下蓋厥氣上逆積於胸中則胃寒胃寒則口食寒物鼻吸寒氣皆得入胃胃者胃之關也外寒斬關直入少陰腎藏故曰中寒也此內經所隱而未言者也一者其脉盛大以濇雖曰中寒尚非卒病卒病中寒其脉必微蓋內經統言傷寒中寒之脉故曰盛大以濇仲景以傷寒爲熱病中寒爲寒病分別寒熱言之傷寒之脉大要以大浮數動滑爲陽沉濇弱弦微爲陰陽病而見陰脉且至死況陰病卒急必無反見陽脉之理若只盛大以濇二陽一陰亦何

卒急之有哉此亦內經所隱而難窺者也

再推仲景以沉瀉弱弦微爲陰脉矣其傷寒傳入少陰經則曰脉微細今寒中少陰又必但言脉微不言細矣蓋微者陽之微也細者陰之細也寒邪傳腎其亡陽亡陰尙未可定至中寒則但有亡陽而無亡陰故知其脉必不細也若果見細脉則其陰先已內虧何繇而反盛耶

在傷寒證惟少陰有微脉他經則無其太陽膀胱爲少陰之府纔見脉微惡寒仲景早從少陰施治而用附子乾薑矣蓋脉微惡寒正陽微所至詩云彼月而微此日而微今此下民亦孔之哀在天象之陽且不可微然則人身之陽顧可微哉腎中旣已陰盛陽微寒自内生復加外寒斬關直中或沒其陽於內滅頂

罹殃或逼其陽於外隙駒避舍其人傾刻云亡故仲景以爲卒病也人身血肉之軀皆陰也父母構精時一點真陽先身而生藏於兩腎之中而一身之元氣由之以生故謂生氣之原而六淫之外邪毫不敢犯故謂守邪之神暗室一燈炯然達旦耳目賴之以聰明手足賴之以持行者矣昔人傲雪凌寒尋詩訪友猶曰一時之興致至如立功異域嚼雪虜庭白首猶得生還幾曾內寒生而外寒中耶故以後天培養先天百年自可常享苟爲不然陽微必至陰盛陰盛愈益陽微一旦外寒卒中而以經常之法治之百中能有一活耶卒病之旨其在斯乎

腎中真陽得水以濟之留戀不脫得土以提之藏蟄不露除施泄而外屹然不動而手足之陽爲之役使流走周身固護腠理

而捍衛於外而脾中之陽法天之健消化飲食流布津液而運行於內而胸中之陽法日之馭離照當空消陰除噎而宣布於上此三者豐亨有象腎中真陽安享太寧故有八十而御女生子餘勇可賈者矣卽或施泄無度陽痿不用尙可遷延歲月惟在外在上在中之陽衰微不振陰氣廼始有權或膚冷不溫漸至飢鞭不柔衛外之陽不用矣或飲食不化漸至嘔泄痞脹脾中之陽不用矣或當膈阻礙漸至窒塞不開胸中之陽不用矣乃取水土所封之陽出而任事頭面得陽而戴赤飢膚得陽而燥脾胃得陽而除中卽不中寒其能久乎

寒中少陰行其冬令埋沒微陽飢膚凍裂無汗而喪神守急用附子乾薑加蔥白以散寒加猪胆汁引入陰分然恐藥力不勝